

# Christian Meivah

September - October, 2017

Lhani seh thuso

Private Circulation



## Hinkho thenga hin

Hoina sangin thenna apha jon ahi. Tahsa thenga koi ho adam thei jon, lungsung athenga koi ho hi Pathenin adei-e. Atheng deilou mi aumpoi. Pathenin jong thenna adei in hijeh chun, “Na Pathenu keima kathen jeh a hi, nangho jong nathen dingu ahi” anati (Lev. 19:2).

1. *Lunggel thenna* : Mi khat chu akam thep manna, milung theng dana akisei leh itahsan jengui. Ahin la athusei thumvei bang ijah jou tengleh milung theng mong hinam ti akihedoh jin ahi. Bible a leng lung thenglou atame. Herod lengpa jong chu alung thengpoi (Mt. 2:8). Nisat lai a anme nehmo akikoi sot a ahile nini vel joule aneng nam jin, akipailo jitai. Anengsa athenglou akidu poi. Pathenin jong anen athenglou adei poi (Rom. 1:28-32). Alunggel theng lou mi chu satanin avop jin akiloipi jin, athun anunsah jitai. Vannoi leiset a imu hou atamjo eisuse diu thil ahi. Rom. 12:1 in “Nati pumpiu chu gan kihing lha, theng le lah thei dolin, Pathen henga kipeuvin” ati.

2. *Lungthim thenna* : Pathenin mi khat avetna hi alungthim chu ahi. Po

lama akivonna ho sedeh duh hen lang, nen deh duh jong le alungthim athen poule Pathenin ama chu alung set in ahi. Mihem ten vang apolam iha vet un, Pathen vetdan toh ikitoh ji pouve. Hijeh a hi Pathen mitvet-a kaphat phat hinam ti, eima le eima ikikhol jiu angai-e.

Mihem khat chu alungchang adamlou tengle athiji tai. Alungchang in na atohlou tengle mihem chu pan na bei ahi. Mihem alung athen lou tengle Pathen vet din athisa ahiji tai. Pathen mi hilou satan mi ahitan, Pathen gama lutlou ding athisa ahitai. Mt.5:8 in, “Mi lung theng ho anun nomui, amahon Pathen amu diu ahi” tin Jesun aseie. Pathen mitmua ahing kahim athisa kahim tijong ki kholji angai-e.

3. *Tahsa lam thenna* : Tipum then na hi ngaichat umtah ahi. Mi atahsa thenga, anam tuisel ho koiman athei da poi. Iti jong theng hen lang, iki vonna jong thengle vang apha pene. Tahsa athen leh natna jong iti chung a amoh lut poi. Abanin, isung lam ve kit leu hen, neh le chah athen leh mi khat nat mohvei vei lou ahi. Tulai khang hin ima jouse bolthei ima jouse neh thei ahita poi. Isungto ki

toh ding kihet a neh ding don ding ahi. Mi bol-bol, mi neh-neh ne kiti chu ngolthu ahitai. Natna atamjo hi eima kitup lou jeh ahi jie. Hijeh chun damna thei ding ho kihet angai tai. Dam ding deilou mi akium poi. 1 Thess. 4:3-8 phaten simin. Setna in eilhiep tengle apet pet-a, Joseph banga jamdoh jeng ding thilpha ahi (Gen.39:12-14). Chomkhat joule dalha nange, tia vohchon tahdi lou ding ahi. Ajeh chu aki vohchon teng le setna chun mi chu achup lo jitai. 2 Tim. 2:22 in, “Khangdon lai lung gul chengsea konin jamin, lung thengsela Pakai min panho chutoh adih, tahsan, ngailut chule chamna holjon” atin ahi. Tulai christian hon satan hi mun ot poute. Pathen gam anai val tai.

## Taona thudol veute

Christian te hinpi khat chu taona hi ahi. Taonaa hat chun mal-somna amu tei in, tha jong anei tei jie. Christian kahi tia, tao habol lou vang ahinlo aumpoi. Idia Pathen chapa Jesu chu taonaa chubanga hat anahim ? Kidang nasah lou ham ? Pathen chapa bon, chubanga apa ahin solpa henga atao hat leh eiho vang taonaa ihat cheh-u ngai ahitai. Jesun aseie juite jong atao hatna diu vin anahile. “Lhadah lou hela tantih nei louva atao jing theina din Jesun aseie juite chu thulem khat ahile” (Luke 18:1). Pathen lunglhai a apan pi kithum ding ideie ule taona a ihat diu ngai mong ahi.

2

1. *Taona kiti hi ipi ham* ? Taona hi Pathen koma thu sein ahi. Tah san puma Pathen henga kingaina ahi. Itao teng Pathen akinganse jeng lou leh imacha apha chompoi. Hapen pena tao jong hithei, olcha cha tao jong hithei ahi. Tulai hin ahapen ho akidei tapoi, avela ho a-ogin in asu boi jie. Suhdukul-a kona tao sangin lungthim sunga kona taojoh Pathenin adeie. Paul in, tanglouvin taovin, tantih neilouvin taovin, eitiuve (1 Thess.5:17). Hichen aseina chu, tao hat in ati ahi. Nathum chu mulei hih jongle chun, lunglha hih in ati ahi. Ithum eipeh dingle eipeh lou ding Pathen kin ahin, tao chu eiho kin ahi.

2. *Atao ding koi ham* ? Mi tamtah in, ‘mijouse tao ding ahi’ tinte. Ahin la, dihtah a chu ‘Pathen cha’ kahi tia kigel pou pou taohen. Milung theng louho taona Pathenin adei pon, lungtheng sela taoho taona ajai (Prov.14:29). Ama tahsan hole aseie ngaiho thumna le taona Pathenin ajai (1 John 3:22). Ahinkhoa Pathen thu ngaiho, aseie ngai ho taona Pathen in ajai. Bible in khat le khat kitaopeh un eitiuve (Jacob 5:16). Itao teng tou ding ham, din ding ham, tiho ki doh thei jong ahi jin, ahinla lunglut tah-a itao ding chu thupi joh ahin, ading nom ding hen, atounom tou jeng hen.

3. *Iti tao ding ham* ? Amasa pena Pathen thangvah ding ahi. Jabolna peh ding, vahchoi ding ahi. Mihem khat koma ima khat thuma nache teng, ama setna chu naseie masa ngai

poi. Thangvah to thoa Pathen chu vahchoi masah ding ahi (Phil. 4:6-7). Pathenin eipuina diuva leh chihna thepna eipehna diuva itao diu ahi (Jacob 1:5). Mivaicha, migenthei, adamlou, lengle lal, lamkai ho, iki hetpi ho dia tao ding ahi (Jacob 5:16). Itao tengle eima kisuh neo ding, ngaidam kithum ding, ilhin lel na le Pathen lunga ithol louna hoa kona ngaidam kithum jong pansah angai-e (1 John 1:8). Midang ingai dam loule Pathenin eingaidam pouvinte (Mark 11:26).

4. *Iti tao ding ?* Ihina het a tao ding ahi (attitude). Pathen tahsan pumle lungtheng sela tao ding ahi. Bible in, “Hiche nam mite hin, kam sungin jabol thu ase-un, alungthimu la kei-a konin agamla lhez-e” (Isa. 29:13) tin Pathenin ase-e. Sao tah tah-a akitaoleh Pathenin ajah chom dia gellou ding ahi. Iseisa avel vela isei sei teng, ajah tei tei din jong gel poute. Pathen ana-ngong poi. Ima khat ithum tengule ilungu jong avet ji ahi. Alungthim iti nam, theng nam, akam le anepu bepseu ham, tijong akhol ji ahi (Mat. 6:5-8). Malai tah san chate taona chu chomcha cha ahi (Eccles. 5:2).

1 Tim.2:5, “Pathen khatseh ahin, Pathen le mihem kah-a palai jong khat bou ahi - mihem Jesu Christa chu” tin eihilui. Hiche jeh a hi itao tengule Pathen koma Jesu mina ithum jiu ahi. Ajeh chu Jesun eiho thudol ahei (Phil.2:5-11).

### Pathen dia pehdoh

Christian khat kahi tia Pathen natohna dia ima pedoh nom lou mi chu, natoh bei tahsana hing ahi. Hitobang christian chu atahsan na tongdoh lou ahin, Bible in amai (Jacob 2:14-17). Natoh bei tahsan chu *tahsan thi* ahi, ati. Mark 12 a hin, meithai vaicha tah khat in, sum anei chasun Pathen natohna dia ato thu Jesun ana sei-e. Jesu asunglam kholtoh jipa hin, midang in aneisun lah-a them khat khat ahinto dan chu ahen, chule hiche meithainu hin anei jouse anato chu ahen, miho henga amanu chun atamto pene, tin anasei tai. Ato jouva ama koma sum ijat umna lai em, ti chu ahet jeh-a ase i ahi. Numeinu sum hi midanga sangin lhomjo tei inte, ahinla ama ding ngaito louva Pathen ding joh agel masat chu, Jesun aseiphat lona ana hikhai.

1. *Pehnomna lungthim* : Miho mu dia peh, kithang-atna dia peh, miho seiphat channa dia peh kitiho hi Pathenin adei poi. Pathen loupina dia peh, ama ihou jeh-a peh, agam kehbea panna dia peh kitiho chu Pathen dei ahi. Michom khat-a guh a Pathen peh chu peh louva phajo ahi. Eima hulsaa kona, eima tha kanga kona peh chu peh dihtah ahijoi. Hou lamkai pa khat in koite kho ham khat-a, hou-in sah pehna din sum anaholin, sum theng bou anaholin, contractor hon atohnom sau sau nauvin, amaho sum athenga aginchat ho bou chu analan ahi.

Christian khat in Pathen dia sum ham thil ham ato hi atahsan kiphonna, leh Pathen angailutna, Pathen ahouna ahi. Apeh ho chu atheng ahi angai-e. Kipah puma it louhela peho chu Pathenin avang boh jie. Akipeh loule Pathen gam iti machal ding ham ? Lei-a agam kehbe dia ama tahsante inganseu ahi. Apang nom louho vang chu, leiset hinkho anuse niuleh khutgoh keuva van lama Pathen toh kimutoa che diu ahin, achungthu kitan nile ipi ahita diuvem, ngaito khamset ahi.

Pathenin phatthei naboh nautoh kikat in peuvin akiti. Pathen din it hih in atina ahi (1 Cor. 16:1-2). Hiche thu hi michang cheh henga kisei ahin, ahao avai, genthei chaga ho jong ahoptha ahi. Kape joupoi, kawai chai, ti aumleh mi ama sanga vaicha mukha tei inte. Meithainun anei chasun ato theile, anei chasun toh dia kawai chai tiho jong akingai to phat angai-e. Thilpha ijat nahin khoa namu hitam, ngaito jile chun pha ahi. Pathenin thilpha eipeh jom na dia enjong pehdoh jing angai-e.

Pathen kipe hi chang kitu tobang ahin, “alhom tun alhom aat ding, atam tun atam aatding ahi” tin 2 Cor. 9:5-7 a akisei-e. Lung lhai sela pea chu Pathenin angailui, aki ti. Pathenin peh nomna lungthim adei in, atamle alhom ave poi (2 Cor. 9:8). Atamle alhom hi Pathen in ahaosat sah chungga um ahin, ama kigel hen. Atam peh chana Pathen

vangbohna atam mu ding jong aumsa ahi (2 Cor.8:12). Pathen dia pehdoh hi ivaichatna ding hilouva inei chehna ding joh ahi, ti nop ding ahi.

2. *Peh phatchomna* : Mat.5:16 in, “Navah-u miho masanga kilang hen, chutile min natoh phat nau mun tin, vana um napau avahchoi diu ahi” ati. Hiche hin, nangma le nangma kihabol un, mi chungga kingam hih un, atina ilah diu ahi. Eiho houbung in, ipi ham khat tohdoh ding itiu le eima ho ikiha meh diu, ahi. Hichu mihon ivah-u amunau ahi. Eima hou bung sanga ima khat bol ding itileh eima houbung mi hilouva kona sum thum kitiho bollou ding, mi suma en ima khat itoh doh-a ahile, ahoilai chu ivah miho anga kilang ding hitam ?

Pathen houbung khantouna dia sumle pai peho chu lhagao lama jong khangtou ahi. Hichu tahsan chu natoh-a kivetsah ahina ahi. Pathen katahsane, tia natoh bei, chu athisa ahi tin Bible in ase-e (Jacob 2). Hi jeh a hi Pathen houbung khantou sah lah-a pan tei chu, ithi teng van gam lutna ahi. Tahsan hing, neiho hiute.

### Ajipa ngailu jinu

Kol teho chonna ngaidolin, til lai chun ajipa athia mei-a ahal lai tah un, meikou lah-a chun ajinu chu aseplut jiuvin ahi. Hitia akibol ding teng koi tobang jinu chu, meikou lah-a choplut hahsa asan anom jipoi. Amaho dia chonna ngai ahijeh chun

lamkai ten amanu chu atom atelin, aman uvin meikou-a chun aseplut un, athikhom sah jiuve. Hiche hi amahon, ‘*Sati*’ tin aminvouve. Hiti a chonna hi British te lamkai anu khah loi in ahinkhah tauve. Tulai hin jong India ningchong lama guhthima mun khat touva aboljomu akija jap jin ahi. Adan hi jinun ajipa angailut lheh vetsahna ana kibol himai inte.

Tulai khang hin ajipa ngailu tah jinu hi eiho lah-a ijat uminte, tia nagel em? Pu Paokam Kipgen leh Pi Nemneikim (Kilong) te nupa kingailut dan hi tulai a din seithei khat ahi. Amani hi Khongbung Baptist Church, Tamenglong District a 1992 kum in dan theng in ana ki cheng lhone. Amani kichen hinkho mandan hi, mihem hinaa geldin thil hahsa hijong leh tuni gei in Pathen janggap ahina lhon anit jing lhonin pachat umtah ahi.

Akichen kal lhon kum 24 lhinna chu, Churachandpur a Kipgen Veng Baptist Church a, Nov. 23, 2016 chun amang lhone. Pasal pa hi aneova kona Pathena kipe tah ahin, “Kanu adam lai in kavai kon kavai lhunin eitaoh peh jingin kalo lhin na atame. Kanu hi taonaa hattah ahin, kachena chana kalung among in, Choir la jilna le Music Training hoa hapta khat val cheng kaga ki manchah jile, kapa le kanaoten na toh khohlai tah le pot doh di nati jie eitiuvin, kanun vang aneova patna, Pathen na tong dinga kana lhan doh

ahi” tin aseie-e. Hiti Pathen natoh naa akipeh lai in, nikhat apan, “Boi pu kadam pet in ji neitan” atin ahile agol teni koma aseile amanin nungah ahin holpeh lhon tai. Pu Paokam jinu Nemneikim jong lasa them khat ahin, anu meithai ahi jeh in avai cha lheh un, houbung kikhopna len hoa anapang joupon, ahinla Haotah Phailen a achen lai un khat vei, chu Sangkai khoa KCK khompia ana pangin, Haotah Phailen a Pu Paomang lasem “Kasetna jouse ngai dam in, Aw Pakai” kiti la asah leh mipin angainom lheh-e, tin amanun aseie-e.

Pi Nemneikim seidan in, “1992 Nov. 23 nin Pastor Lhuthang in Pathen mina eina goplhon ahi, 24 nin insunga lhacha hotoh chadon khomna kanei un, ajing nikho 25 nin thingpon kache lhone. 26 nin insung damlou jeh in ka-inneipu Kangpokpi jonin ana kalsonge. 28 nin inlanga ahung kile in atouna gari Shaktiman ahung accident in, apet pet in RIMS a akipolut in lhakhat valjen Ortho Ward a Oxygen ana kito peh-e. Doctor hon athina ding atep jiuvin, athilou phat in Rehab Centre a eisol un, hia chu akhup-a pung ni, athal a pung ni, asih a pung ni ahei leleule Oxygen jong peh ngaita louvin ahung phadom tai. Imphal a eimi hon jong neh le don eina kitho piuvin, keivang kaa tilou lunggel je kanahe poi” ati. Chuin Guwahati a Neuro a kijen din, ahung un, Guwahati ten Vellore lama achena diuvin aseie ui. Ahinla sum aneilou jeh un inlam joh

a ahung kile tauve. “Hospital a pat na kahung doh un Pa Haokhothong te ina jankhat kahung gehpa un, anneh twidon, lupna touna kitup chet in eibol peh uvin, kakipah uve” tin jong Pi Nemneikim in asune.

Pu Paokam in hitin aseie-e, “Kadam ding deina doctor mun tina kache lhonin, lunggel bang ahilou phat in ken jong kaloinu koma, keila adam dingin kaki tahsan ta pon, nang jong namakho ding kigel in lang neidalha jeng tan, katin ahile Pathen mina kigoma iti kamoh da lhah ding ham, eitin ama joh in eilha mon joh in ahi. Lung leng lou helin tuni gei in eiumpin ahile kaloinu Kikim jalin Pathen kathang vah jie. Keihi kakhut kakeng acha theilou jeh in, aloi agol lah-a alhah jingle lung mongin alha thei jipon, kei ding gelnan agol ho ngah jou louvin, aki khopnaa konin eihin deltho jie. Neh le don ho jong keiding eihin choipeh jin, achan chungalung lhai-a tuni chana eijen ho kagel le ama jalin Pathen kathang vah-e” ati.

Tua amani seh Kipgen Veng a akivah dan lhon, Kikim in hitin aseie in ahi, “Lekha hi class V chan kana simin, insung hahsat jeh in aban kanasim be tapoi. Kasum lo naa, ka natohnaa, ka inneipu adam doh joulou dia kagel phat le katucha kaleh lhan kakap jie. Min eimule angol eihi sah inte kati kit jin, teh se hon gamlah a ka hi ana jah nom lou vu kagel doh jin, keile kei kakam

ka kisip jin, ol olin kaki lhembijie. Kanun eihilna jong kalunga aging jingin, ‘Boinu mi insunga hung minse get in nate, Pathen lhaso hih beh in’ tin eina tilkhon jie. Ka inneipu chat thei talou kaumpi jing jeh in, seiset na jong, pachatna jong kaja jinge. Akisei jouse alahdan kahen, Pathen kathang vah-e” tin Pi Kikim in aseie ben ahi. (*Tukum akichen kal lhon, kum 25 gei sunga hi, ajipa la akhut akeng chat thei lou ahijeh-a ajinun abol theina kham khama neh ahola hung kivah vah lhon ahin, lungset umtah ahi lhone*).

### Pathen thangvah jing ding

Lengpa khat in Mantri ching tah khat anei-e. Mantri pa hin Pathen hatah in atahsane. Ahinkhoa apha hihen ase hijongle ahungso tengle, “Hiche hi Pathen phat sah ahi, eiho phatna ding ahi, Pathen thangvah in umhen” ati jin, lengpan hiche hi ana jahda kei jin ahi.

Nikhat lengpa leh Mantri pu hi gamleng in ache lhonin, haiphung noi khat a akicholdo lhon pet in, leng pa chun haiga khat achemchan aat lhan ahile akhut jung aki aatkah in athi apot tai. Mantri pu chun anailut in atheh ngimin, ponse khat in atom in, “Pathenin eini phatna dia hiche hi asosah ahi. Pathen thangvah in umhen” atin ahile lengpa chu alunghang lheh jenge. Gamlenna kona in ahung lhun lhonin, lengpan Mantri pu chu songkula akhume. Songkul a akhum

chun Mantri pun, “Neikhum jong hi Pathenin eini vangphatna dinga aso sah ahi, Pathen thangvah aume” ati kit leuve. Lengpa chu alung ahang nan, ima aseipoi. Nikhat lengpa hi achangin gamleng in anachei. Gam mang noi khat ajotpan, hikoma chun thinglhang mi kho khat ana ume. Amaho chun a-pathenu houna dia mihem khat ana ngaichat laitah-u ahin, lengpa chu akimat un, a-pathenu lim mai-a akanchah un atou sah un, thadin akigo tauve.

Hiche pettah chun, amaho lengpa chu ahungin, mihem amatpau chu nolna bei, atichung theng hinam tin ahin jutle tai. Lengpa hila akap kap jeng tan, ahintha diu bou chu ana geltai. Thinglhang miho lengpan ati chung ahin khol lai hin, tilla haithai alonaa chemchan a-atkhahna chu ahin mun, atichung atheng poi, tin ahinlha doh tauve. Lengpa hi akipah behseh in, a-in alhun lhunin Mantri pu chu alha doh in, athusei ana jah da chu ngaidam akithumin ahi.

Chujongle lengpan Mantri pu henga, “Nang dia songkula nalut hi pha nasah em, nasah hih em ?” tia adoh leh Mantri pu chun, “Lengpa, Pathenin nangma namanchah a kei songkul a neikhum kakipah vale. Chutilou hileh nang toh gammang a ikilhona thinglhang mihon, keijoh eiki thadoh diu anahi. Kati chung a ima kisuh khahna aumpon, kajol sele” anati. Ipi soh jongle, Pathen thang vahna peh hi iti phatchoma hitam !

### Damun thudol het dia pha

Mark 9:48, “Damun chu alungla thimo, ameikong la mitmo ahi” tin Jesun ana sei-e. Damun hi kichat tijat umtah mun ahin, ameikou thimo hin michonse khat chu kah dia anga jing ahi. Nakichat lou ham ? Hikoma chun lungle than ho aumin, amaho chun Damun a lut ho chu ape pe jingu, lung jong thilou, meikou in mi ahal jong beiti neilou mun ahi. Alut ho kamsungle nah hom bilkol hom sunga lung ho chu lutle potle diu, kidah dah uma, theida da uma, lohso jong um ding ahi (Isa.66:24).

Hiche Pathen lunglhangna meikong sunga nalut noma ahile, tu lai hin satan nung jui in (Rev.19:15, 21:8). Satan nung jui hi ahahpon, anop a nom ahi. Bible in, manna lampi chu akot jaatah ahin, alampi jong lentah ahi, hia lut a chu atamin atame, ati (Mat.7:13). Mi tamtah lutna mun chu, lutpet a anop a nom tei ding ahi. Alut ho lah-a chu, tol that, jonbol, mijou, doichoi, sum dei val ho panginte. Thet umtah tah ho chu mei le kath meikou alleng lung lah a kileh lut ding, hichu thi nina chu hiding ahi (Rev.20:14, 21:8).

Apengthah lou, hinna neilou jouse itobangin thilpha bol hijong leu, atoh phat ule achon phat nauvin ahuh doh joulou ding ahi. Thilpha ijat bol jong leu meidil sunga chethou thou diu ahitai. Kise khen ni chule hinna neilou mihem ho chun, Pakai keihon

namina thu kasei louvu ham, namina thilpha kanodoh-u hilou ham, namin a bolmo kidang kabolu hilou ham, ati diu ahi. Chutengle Jesun aheng uva, vo chonset bolte ho, keiman nangho itih in jong kahe khapoi, ka koma konin chemang tauvin, atipeh ding ahi (Mat.7:21-23). Hijeh a hi, Jesun akikou vang atamin, lhendoh vang alhome, anati ahi (Mat.22:14). Jesun, mi koi hileh chung a kona thahpen kit lou chun, Pathen gam amuthei poi, anati (John 3:3). Paul in, Christa lhagao neilou chu Christa a ahipoi, ati. Christa ihi loule itiba kisochat ding ham ? Rom.8:9.

Tulai houbung miho vetem un. Pengthah louva Pathen hou aki be jingin, pengthah louva chonpha le thilpha bol atam cheh cheh in, pengthah louva hou natong jong hi atamin atam tai. Iti ding hitam ? Ito bangin kichonphat sah jongleu hen, Pharisee holeh Sadducee ho chon phatna kipha jou ponte. Koima cha akison theilouna dia hichu thilbol vanga hilou ahi.

Damun umdale pham ? Da mun aumlou akhohna hi nahet em ? Damun hi Pathen lunglhangna dim setna mun ahi. Damun kitem lona hi, satan jeh ahi. Satan in Pathen thilsem jouse asuhset a, Pathen ahin dou phat-a, Pathenin ahentupna dia Damun Meidil hi agot peh ahi. Pa thenin ama limle mela mihem asema, nomtah a hinsah ding ati chu satan in ah et a mihemte chu alhep lhah-a,

mihem lung sunga pansaa, Pathen adou ahi. Mihemte amanchah a, Pathen adou ahijeh a chu, satan le mihem sei ngailou ho khum khomna dia Pathenin Damun Meidil anasem ahi. Pakai Jesun Damun le Van gam kot ahon dan chu hiti ahi. Thingpel chung a abaan ajah-a hi, ajet lama van kot ahona, avei lama Damun kot ahon ahitai. Ahile, nangma tutah-a hi hoilam joh-a chu nache em ? Avei lama che anop ding dan isei tauvin, tun ajet lama cheho ahah dan veute. Hinna lampi chu akot ajimin, alampi akichi in, alut chu lhomcha ahi (Mat.7:14).

Tulai christian, koima kot jima alutnom tapouvin, nopsahna le loupina joh in alungu alodime. Hou lamkai phabep jong, kot jima lut sangin kot jauva lut ding athanom un, vannoi leiset nopsahna in alloh mang diuvin aumtai. Mit lhi pumle kappum a thoh hahsa thoh ding akingapcha tapouve. Paul in Timothy henga, ima lam jousea limgeh chan umin, thoh hahsa chu thoh in, evangelist na chu tongin, nalhacha natoh chu bulhit molson tin anahile (2 Tim.4:5).

Satanin mi ajoplut dan hi, neh le don atui tui amangin, sum ngailutna le haosatna amangin, hou natong phabep gei in, anomlam ahol tauvin, hou natong hon jong Damun thu aseinom tapouve. Pathen lung hanna meikong leh Pathen thupi tan ding ikicha tapouve. Damun Meidila lut te chu kum sangsom sangja dia lut ahi uve.

(Rev. Seikholen)

## Thohgimna sanga loupina

Leiset thoh gimna sangin, khonung loupina alenjoi, (Gen.3:14-24, Rom.8:18-39). Pakai Jesun ama seijui hon hahsa athoh dia ase chu (Mk.8:34), khonunga achan diu loupina alet joh ding ase a kona, Paul in hitin ahilchen in ahi.

1. *Lhagao nei-a mihem* : Mihem keo hilouva, Pathen thilsem dang pumpin jong chonset jala gim genthei kithoh ho khonunga Lhagao a hinjinga anopna chutuh lepkah thei in aumpoi. Khonung hinkho vang nommong ding ahi. Mihem tahsaphe hi chonset a soh banga aki henna kona Lhagaova pilhing hiya, hinjing ding ngahlel jing thilsem jou sen kinem tah-a tulai a hi anga jingu ahi.

Tua tahsaphea hing nalai Pakai Jesu tahsan hohin, Pathen Lhagaova ahinnau nom asahpan nau hi Pathenin cha-lamthua akisim nau hinkho anopna atekhah pan ahitai. Cha lamthu (adoption) akihi khah hi Pa Pathen insung mi hina ahin, Pa'n eidonda pouve ti hetna ahi.

2. *Lhagao hinkho nopna* : Pathen chaa kiminvo ho jousen, Pathen Lhagaova hindang dan hi kitepkha pana ahitai. Tahsaphea hing mihem in Pathen Lhagao le mihem lhagao a hinkhom pet jenga hijong, Pathen Lhagaova hin anopje kihedoh pan ahitai. Tahsaphe lhagao le Pathen Lhagaova hinpet jenga jong Pathen

Lhagaova hindan anopje akihet doh thei le, Pathen Lhagao sehseh-a aki hin teng leh hanop in nomlneh tante. Pathen Lhagao sehseh-a hinna ding dei-a, hiche tahsa thithe ki henna a kona kilhadoh a thikit talouva tonsot kumkhoa Pathen Lhagaova hinkal ngahlel a um akihi jinge.

3. *Pathen ngailutna* : Pathen ngailutnaa konin imachan eikhen thei pouvinte. Semtila pat Pathenin lung set jala gontohsa akoisaa kon chun imacha chan eiloikhen thei lou diu ahitai (Rom.8:33). Hesoh genthei lungdonna bolsetna gilkel pon bei a um, chemjam hem leh adang dang ipi hijong, Pathen toh eikhen jou diu aumpoi. Chonse kit louhel dinga, athisa bang banga umthim beh, chonset bolthei louna dinga tha dia kihen kelngoi nou banga um thimbeh akihi tai (Rom.8:36). Pakai Jesun ei lhatdoh nau gel jinga, Pathen chapa ngailutnaa kona imacha chan, cha lamthua eithahsem pau Pathen toh eikhen diu aumpoi. (Dr. T. Lunkim)

## Damna thei phabep

Twi donjing tahsa damna ahi. Najingtho tho leh twi khonni donle chun, nasunga natong pan ding ho ahin suhlip ding ahi. Anneh masang pung makhai a twi khon khat akidon le sunga ineh aminsah jie. Kisil kona twi khon khat donhi Blood Pressure nemsahna ahi. Imut kon seh-a twi khon khat donin, stroke leh Heart Attack adou dale.

## Nuitem in, damna ahi

\* America a electric ahungthi leh amahon 'power house' aphon jiuvin, Japan gama electric ahungthi le ama hon ainuva 'Fuse' chu ave loi un, chule India a electric ahungthi le in hengte ina mei vahnam tin akive loi jie.

\* *Khang kikhel dung jui in, hiche teni hi adih cheh-e* : Apa chu dang ka somni itna in, somni mana Rickshaw lah sangin tin, akeng in lampi ajot in ahi. Achapa'n, dangka som ni manin Rickshaw akilah in, aphot minit 20 kenglam chu minit ni kah in alhunge. Tillai sanga tulai a phat ki-it ahitai.

\* Nungah khat hi Library a achen, lekhabu vetuppa henga, "Suicide" thudol kisun lekhabu neipen tin ana thume. Hiche phat chun, Librarian pa chun amanu chu aven, "Ahile, kalekhabu chu konba eihin nungpeh ding hitam?" tin ana donge.

\* Nungah khat jinei ni-in, apan Pastor pa pehdoh din amanu chu akhut in ahinkai in, aji dingpa touna aphah in Pastor pa khut-a akeh doh pet in, achanun apa khut-a ipi ham khat anapei.

Mipi chun, kidang asauvin, ipi pen tah akeh ahidem, hin phong doh le tin anave vetauvin ahi. Apa'n mipi lunggel chu ahen, hijeh chun mipi henga chun, "Kakipah-e, ka chanun tunin ka ATM Card eihin le peh kittai" atin ahile mipi le Pastor chu anui uvin, ahinla aji dingpa vang

chu amai amol theh jenge.

\* Pasal khat in nom tah a lam ajot pet in, ogin khat in, "Kal khat nason be pou pouleh, cheh tum khat in nalu jang akhet ding ahitai" ahintin ama jong kintah in, ading den tai. Chuin cheh tumkhat amasanga ana chui. Ipi thu hia ham, tia gel pumin, achebe ben ahile ogin mama chun, "Ding loi in, kal khat nasonbe pou pouleh gari hattah khat in nahin tah lih jeng ding ahi" ahintin, adin loichal a ahile gari khat amasanga eovilin ahung lhain ahi.

Chuin amapan, "Nang koi nahia hibanga neihepi ham?" tia ana doh leh ogin chun, "Keima hi naching jinga vantil chu kahi" anati. Pasalpa chun, "Ahile, kajihol lai-a hoi-a ba nana-uma, hiche mi khohnu khu jia kanei khah-a ham?" tin ana seipeh in ahi.

\* Upa naolhang thum hotel a atou un cha adonui. Khatpa'n, "Lekhabu kiti vang hi thanei tah ahi. Kaloinun nao anei konin, Charles Dickens sut 'A Tale of Two Cities' asim simin ahile anao nei phat in cha ni apeng kop doh tai, ahinti. Chuin pasal ani na pa chun, "Nasei chu dih inte. Ka loinu in jong anaovop lai in, 'The Three Musketeers' kiti lekhabu chu ana simin ahile anao nei nin, cha thum apeng kop tai" ahinti. Pasal athum na pa chun hiho ajah chun akingaise le len ahi. Amanin nanga sei in atilhon leh aman, "Keivang mi vangse kahi. Kaloinu nao soh vah ding ahitan, tulai hin, 'Ali Baba and the forty thieves' thanom tah in asime" ahinti.

## Het-a phachom ho

11

\* Astronomer hon van chung a Planet thah khat jong amudoh un, amin hi KELT-9b tin asah un, amahi Jupiter let dannia len ahin, chule asat dan hi nisa sat dannia ahi atiuve.

\* In-dan sanga kaltouna LIFT jat chom khat China ten insanga asuto uvin, hiche hi agan dan chu, minit khat a meter 1260 ajot ding ahi. In asangtah hoa din hiche elevator (lift) hi kijen lseh intin, ahinla atou ho aki chase vang haingam louvin, kichau vinte.

\* Scottish Episcopal Church (UK) in tu naicha chun, nule nu, pale pa (gay couples to marry) hou-ina kichen sah theina ding kinop tona anei tauve. U K sanga *same sex marriage* phalna pe houbung amasa pen ahi. Amaho gam Scotland govt in vang 2014 kuma anaphal sau ahitai.

\* Tukum June lha chun, Shillong a numei khat suna ina achanga aum pet in, pasal khat ana lut in, angong a aki-o sana khimu, abila akiba sana bilba, chule akhut-a akibu sana khut theh chu namchangin alah peh tai. Bilba chu asalhah jengle abil a-eh in thi alongin, chule khut theh jong chu man-gang tah-a alah doh got leh ana chahkkeh jeh chun, chem in akhut jung chu asat tenin akilah doh in, athisan lon jeh in amanu chu athimil in, amudoh hon kintah in hospital a analhut tauve. Hijeh hin tulai hin, sana thila kivonna ngam ahitapoi.

\* Tahsa gonna dia lou kijoh ho tah san hih un, tin ahethem hon aseie. Akineh pet a themkhat akikem suh vangin, ol olin akithao doh kit jitai atiuve. Chule hiche lou hin mihem *hormone* asusen, lungthim jong atongkhan, tahsa khantouna jong asumoi, atiuve. Agongjep nom hon twi ahadona, exercise phatea abol jinga, neh le chah thaona ding ho angol jep uvin aphajoi atiuve.

\* Tulai tah in, ukil themtah minche tah khat aumin, amin hi Harish Salve ahin, amahi christian ahi. Nagpur a 1956 chun ana penge. Sum jong tamtah tah alan, case ahahsa tah ho alajin, ajolel jong aum behpon, khat vei a ajolou aumle aniveina kihah apan jin ajou thou thou jie, tin jong akiseie.

\* Eiho North East India nungah Delhi langa natong, air-hostess, ho hi anu apan phatea akihil diuvin, het sahna akimui. Amaho hi kol le sap hon alhep lhah jiuva akichen piuva, chomkhat jouva adondau atamtai ti akijai.

Nungah theng khat akidei pipan, jan le alaampi jia judon athep sah a air-hostess na atohna ten ahai sah-u, apasal panla dalhata sumle pai adei jeh-a kingol sah pai thu akijan, numei khat jong kol doctor khat toh amaho hou-ina kicheng lhon, khonunga pasal pan adonda, chule natoah dang hoa lo tampi pia a nungah thah ho lhemlha aume, akiti. Hijeh hin, achanu migama natong sumlo neiho kichih thei ute.

12

*Christian Meivah* - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un. Manipur le Nagaland a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.
- 9) Mr. Kapcha Singsit, Dimapur.

## Het-a phachom ho

\* Tulai in School Bag hi chapang boina phatah ahitai. A school bag gih behseh po chapang ho atamjo akum 14 ahi dongin, tungtun nat, nahgu nat, tingbong aumtai. Hijeh chun minu mipaten nachateu Bag poh kithopi uvin, school jong Bag gihlou deu holpeh un.

\* Kum 1998 a Catholic nungah (Nun) mi li, anasusea kithang pa chu kum 11 sungin sorkar in akisel lele vangin. ahin hol holin, April 18, 2017 chun Madhya Pradesh a kon in aman doh tauve.

\* Manipuri Christian Fellowship, Guwahati ten kum 25 alhin nau Silver Jubilee, 10-11-2018 nile Pilangkata-a, aman diu ahi.

*Christian Meivah*  
September - October, 2017

PRINTED MATTER

To :

Editor :  
Rev. M. Haokhothong,  
C/o, Tingjanem Manchong  
Nichols Higher Secondary School, Satrbhari,  
P. O. Rehatabari - 781008, Guwahati, Assam.